

1

D I E S  
ECCLESIASTICA

PER LOCA  
SACRAE SCRIPTURAE  
P R O G R E D I E N S.

---

Haec verba loquutus est Dominus .  
Deut. 5.

Audiam quid loquatur in me Domi-  
nus Deus . Psal. 84.

Et loquar ad Dominum , cum sim  
pulvis , et cinis . Gen. 18.

*Donus J. M. Maydalenus*



*Romae*

ROMAE MDCCCXVII.

APUD FRANCISCUM BOURLIE

*Superiorum Permissu .*



1911

# REPORT

ON THE

PROGRESS OF THE

WORK OF THE

COMMISSIONERS OF THE

LAND OFFICE

FOR THE YEAR

1911

PRESENTED TO THE

LEGISLATIVE ASSEMBLY

IN THE MONTH OF

MAY 1912

## D I E S

## ECCLESIASTICA.

## I.

*In excitatione matutina.*

**D**omine Deus meus , Creator  
 Coeli , et Terrae , qui lucem habitas  
 inaccessibilem ; tuus est dies , et  
 tua est nox . Tu fabricatus es Au-  
 roram , et Solem , quem oriri facis  
 super bonos et malos . Benedico te ,  
 quia vocasti me de tenebris ad lu-  
 cem . Ego dormivi , et soporatus  
 sum : et exurrexi , quia tu , Domi-  
 ne , suscepisti me ; factus es Prote-  
 ctor meus , et in requie mea reple-  
 tus sum bonis . Repletus etiam sum  
 mane misericordia tua : exultavi ,  
 et delectatus sum . Repleatur igitur  
 os meum laude , ut cantem gloriam  
 tuam : tota die magnitudinem tuam .  
 Luceat Domine lumen justitiae , et  
 lumen intelligentiae oriatur in me ,  
 donec aspiret dies , et inclinentur

umbrae : ut crescam in gratia , et cognitione Domini Nostri Iesu Christi : et semita mea sit quasi lux splendens et crescens usque in perfectam diem . Expande nubem in protectionem meam , et sis mihi in velamento diei , ut in velamento alarum tuarum exultem , et adhaereat anima mea post te . Qui mandasti Angelis tuis de me ut custodiant me in omnibus viis meis , mitte Angelum Sanctum tuum , qui praecedat me , et custodiat in via , et introducat in locum , quem parasti mihi , ubi cum Unigenito Filio tuo , et Spiritu Sancto est tibi Deo nostro Benedictio , et claritas , et sapientia , et gratiarum actio : honor , et virtus , et fortitudo in saecula seculorum . Amen .

*Alia Oratio .*

**O** Bone Iesu , Sol Justitiae , Lux vera , quae venit in Mundum , et illuminat omnem hominem : et dilexerunt homines magis tenebras ,

quam lucem , illumina eos , qui in tenebris , et in umbra mortis sedent . Surgant de somno suo ; nox enim praecessit , dies autem appropinquavit . Abjiciant ergo opera tenebrarum , et induantur arma lucis . Fac Domine ut sicut in die honeste ambulemus , dum lucem habemus : ut simus filii lucis , et non nos tenebrae comprehendant ; antequam veniat nox , in qua nemo potest operari . Sanctifica diem istam , et omnes dies vitae meae , ut placeam coram te in lumine viventium . Amen .

*Alia .*

**D**omine Jesu , qui surrexisti diluculo , et gloriosus e sepulchro apparuisti , excita me sicut excitasti Lazarum amicum tuum dormientem de somno suo , ut tecum surgam , et illumines me , et ne dormitet amplius anima mea prae taedio . Exurge igitur gloria mea : exurge psalterium , et cithara in adjutorium

meum . Fac ut , dum lumen Coeli video , recorder tui , qui ascendisti super Coelos Coeli ad orientem ; et quoniam quadrigae tuae salvatio , trahe me post te in locum , quem parasti mihi in Regno tuo . Per singulos dies benedicam tibi , et laudabo nomen tuum in saeculum , et in saeculum saeculi ; à Solis enim ortu usque ad occasum est laudabile Nomen tuum , donec dies sancta elucescat , et Lucifer oriatur in cordibus nostris : donec videam diem tuum Domine , diem , in quem jam nunc gaudeo , et exulto . Mane surgam ad vineas : Vineam meam custodiam , in qua tu Domine custodem me posuisti ; ne auferatur à me Regnum tuum , et detur Genti facienti fructus ejus . Quia tu Domine vocasti me de tenebris in admirabile lumen tuum , ut essem lux Mundi , da ut luceam coram hominibus , ut videant opera mea bona , et glorificent te Patrem meum , qui in Coelis es . Clarificem te hodie super terram , quemadmo-

dum clarificavit te dilectus Filius tuus, qui dixit : Me oportet operari opera ejus , qui misit me , donec dies est : Qui splendor est gloriae , et candor lucis aeternae , et tecum , et cum Spiritu Sancto vivit et regnat in saecula saeculorum . Amen .

*Ante Meditationem .*

**A**d te Deus meus de luce vigilo , ut adorem , et laudem te : et praevenierunt oculi mei ad te diluculo , ut meditarer eloquia tua ; quoniam oportet praevenire solem ad benedictionem tuam , et ad ortum lucis te adorare : et qui mane vigilant ad te , invenient te . De mane vigilavi ad te : et in matutinis meditabor in te , quia fuisti adjutor meus . Surrexi diluculo : quaeram quem diligit anima mea : tenebo eum , nec dimittam donec benedixerit mihi . Et quoniam omne datum optimum , et omne donum perfectum de sursum est , descendens a te , Pater luminum , illumina te-

nebras meas. Mitte ignem in ossibus meis, et erudias me; si enim in meditatione mea exardescet ignis, ignis in Altari tuo mox, et semper ardebit: et ita non apparebo in conspectu tuo vacuus. Ne amoveas benedictus Deus deprecationem meam, ut non amoveas misericordiam tuam a me. Oculi tui sint aperti, et aures tuae erectae ad orationem servi tui, qui in loco isto orabit. Loquere Domine, quia audit servus tuus, qui loquetur etiam ad te Dominum suum, cum sit pulvis, et cinis.

*Actus Fidei Theologicae.*

**B**enedicam te Domine in omni tempore: semper laus tua erit in ore meo; quia vocasti me de tenebris in admirabile lumen tuum ad agnitionem veritatis, ad cognoscendum te solum verum Deum, et quem misisti Jesum Christum, in quo est vita aeterna. Non fecisti taliter omni Nationi. Signasti me Spiritu



9  
promissionis Sancto, et dedisti mihi  
pignus haereditatis tuae : Spiritum  
adoptionis Filiorum Dei, cum natus  
sum denuo ex aqua, et Spiritu San-  
cto. Tu sapiens Domine, et verax  
es : ideo adhaesi testimoniis tuis,  
quae credibilia facta sunt nimis, et  
mirabilia. Revela igitur oculos meos,  
et da mihi Spiritum Sapientiae, et  
revelationis in agnitione Tui, et  
Jesu Christi. Confirma me Domine  
in verbis tuis, ut sim fortis in fi-  
de. Credo, Domine; adjuva incre-  
dulitatem meam. Da mihi illam fidem,  
quae per Charitatem operatur : ne  
fides mea sine operibus mortua sit.  
Amen.

*Actus Spei.*

**B**eati qui habitant in domo tua,  
Domine : in saecula saeculorum lau-  
dabunt te. Regnum Coelorum, Do-  
mine, domus tua est : et in hac  
domo Patris tui mansiones multae  
sunt ; sed nec oculus vidit, nec au-  
ris audivit, nec in cor hominis ascen-

derunt quae praeparasti diligentibus te . Benedictus Deus , et Pater Domini nostri Jesu Christi , Pater misericordiarum , qui secundum misericordiam suam magnam regeneravit nos in spem vivam per Resurrectionem Jesu Christi ex mortuis , in haereditatem incorruptibilem , et incontaminatam , et immarescibilem , conservatam in Coelis . Laetatus sum in his ; quae dicta sunt mihi : in domum Domini ibimus . Ibi similes tibi erimus , Domine , quia videbimus te sicuti es . Nunc per speciem , et in aenigmate : tunc autem facie ad faciem . Satiabor itaque cum apparuerit gloria tua . Salvatorem te expecto Dominum meum Jesum Christum , qui reformabis corpus humilitatis meae configuratum corpori claritatis tuae . Hanc spem habeo in te , Domine , qui es spes mea : qui es fidelis in omnibus verbis tuis , in quibus supersperavi .

Dixisti quidem tu , Domine : Multi sunt vocati , pauci vero electi : Arcta , et angusta est via , quae du-

cit ad vitam ; sed misericordia tua Domine praeveniet me : et in te sperans non infirmabor , sed contendam intrare per angustam portam : ut sim inter paucos electos tuos . Spero enim quod eadem misericordia tua subsequetur me omnibus diebus vitae meae , ut inhabitem in domo tua in longitudinem dierum . Et licet peccaverim , Advocatum habeo apud te Patrem Jesum Christum justum , qui est propitiatio pro peccatis meis , et non pro meis tantum ; sed etiam pro totius Mundi : qui dilexit me , et lavit me in sanguine suo , semper vivens ad interpellandum pro me . Inclinavi igitur cor meum ad faciendas justificationes tuas in aeternum propter retributionem : nec aliam , nisi te Domine , qui eris merces mea magna nimis . Reposita est haec spes mea in sinu meo . Amen .

*Actus Charitatis .*

**D**iligam te Domine fortitudo mea : Dominus firmamentum meum ,

refugium meum , susceptor meus ,  
et liberator meus . Diligam te ex  
toto corde meo , ex tota anima mea ,  
ex tota mente mea , ex omnibus vi-  
ribus meis : quia tu solus bonus es  
Domine ; quid enim mihi est in  
Coelo , et a te quid volui super  
Terram ? Concupiscit , et deficit Ani-  
ma mea : defecit caro mea , et cor  
meum , Deus cordis mei , et pars  
mea Deus in aeternum . Omnia ar-  
bitror detrimentum , ut Christum  
lucrifaciam . Quemadmodum deside-  
rat Cervus ad fontes aquarum , ita  
desiderat Anima mea ad te Deus .  
Et quoniam qui diligit Deum , odit  
iniquitatem ; omnem viam iniquam  
odio habeo , et ab omni via mala  
prohibebo pedes meos : et exerce-  
bor in mandatis tuis , quae manda-  
sti custodiri nimis . Laetantur Pec-  
catores cum male fecerint , et exul-  
tant in rebus pessimis ; ego autem  
in Domino semper delectabor , qui  
benefecit mihi ; in Domino gaude-  
bo , et exultabo in Deo Jesu meo .  
Utinam universi fines terrae conver-

tantur ad Dominum, et revertantur  
 impii a via sua mala. Defectio tenuit  
 me pro peccatoribus derelinentibus  
 legem tuam. O Domine, exardescat  
 in me ignis tuus sanctus, quem venisti  
 mittere in terram, ut accendatur.  
 Effunde super me de Spiritu San-  
 cto tuo, ut nihil possit me separa-  
 re a charitate, quae est in te, Jesu  
 Christe. Benedic Anima mea Domi-  
 no, et omnia, quae intra me sunt;  
 Nomini Sancto ejus: benedic Ani-  
 ma mea Domino, et noli oblivisci  
 omnes retributiones ejus; qui pro-  
 pitiat omnibus iniquitatibus tuis,  
 qui sanat omnes infirmitates tuas.  
 Qui redimit de interitu vitam  
 tuam: qui coronat te in misericor-  
 dia, et miserationibus. Quomodo  
 miseretur Pater Filiorum, misertus  
 est Dominus timentibus se; quoniam  
 ipse cognovit figmentum nostrum:  
 recordatus est quoniam pulvis su-  
 mus. Diligam ergo te, Domine Jesu  
 Christe, ut diligar a te, et Patre  
 tuo: ut cum ipso venias ad me,  
 et mansionem apud me facias; ut

sim unum tecum , sicut tu Unus es cum eodem Patre ; et Spiritu Sancto in saecula saeculorum . Amen .

*Oblatio sui .*

**T**u Domine Rex meus , et Deus meus . Dominus universorum tu es , et in ditione tua cuncta sunt posita . Deus meus es tu , et in manibus tuis sortes meae . Omne datum optimum , et omne donum perfectum de sursum est , in me descendens a te o Pater luminum . Si ergo nihil habeo , quod non acceperim a te Deus meus , quid retribuam tibi pro omnibus , quae retribuisti mihi ? Vota mea Domino reddam N. N. N. Tibi etiam Domine in simplicitate cordis mei laetus offero universa : animam et corpus meum , ita ut ardeam : cogitationes meas , et opera mea : et omnes dies vitae meae , quorum numerus apud te est ; ut omne quodcumque faciam in verbo , aut in opere , omnia in nomine Domini Jesu Christi , gratias agens Deo

et Patri per ipsum : sive enim vivo, sive morior, tuus sum Domine . Custodi hanc voluntatem Deus Israel , et ad venerationem Nominis Sancti tui mens ista permaneat . Amen .

*Recta Intentio .*

**U**tinam omnes viae meae dirigantur ad custodiendas justificationes tuas : ut clarificem te super terram, non quaerens gloriam meam, sed tuam Domine , qui in Coelis es : ut possim me tibi offerre Hostiam Sanctam , et beneplacentem , et rationabile obsequium ; ut sim in laudem gloriae tuae . In capite libri scriptum est de me, ut facerem voluntatem tuam : Deus meus volui, et legem tuam in medio cordis mei , et quae placita sunt tibi faciam semper . Pater sancte , sanctifica me in veritate, ut possim in omnibus operibus meis tibi placere , qui es Sanctus in omnibus operibus tuis , per dilectum Filium

tuum , in quo tibi tam bene complacuisti , per quem est tibi , Deus omnipotens , honor , et gloria in saecula saeculorum . Amen .

*Oratio Dominica .*

*P*ater noster , qui es in Coelis . Domine Deus noster , qui in excelsis habitas , et humilia respicis , et alta a longe cognoscis , cui est cura de omnibus , qui de Coelo prospicis super filios hominum , respice in me , et miserere mei . Pater Sancte serva me in Nomine tuo , et custodi me ut pupillam oculi .

*Sanctificetur Nomen tuum .* Fac ut adorem te Deum verum in Spiritu , et veritate : ut confitear Nomini tuo magno , quod Terribile et Sanctum est : ut manifestem illud hominibus : ut doceam iniquos vias tuas , et impii ad te convertantur . Propterea laudem dicam tibi , et benedicam Nomini tuo in saeculum .

*Adveniat Regnum tuum ,* quod non est de hoc Mundo , sed est Re-



gnum omnium saeculorum . Regnum tuum sit intra nos , quod non est esca , et potus , sed justitia , pax , et gaudium in Spiritu Sancto : ut possim post mortem edere , et bibere super Mensam tuam in Regno tuo .

*Fiat voluntas tua* ; justus enim es Domine , et rectum judicium tuum : et omnia , quae facis , in vero judicio facis . Doce me igitur facere voluntatem tuam , quia Deus meus es tu .

*Sicut in Coelo et in Terra* . Sive quae in Terris , sive quae in Coelis sunt , tuae obediant voluntati ; ut in obediendo mandatis tuis non alia sit coelestium gloria , alia autem terrestrium .

*Panem nostrum quotidianum da nobis hodie* . Tu Domine , qui das escam omni carni , et imples omne Animal benedictione , victui meo tribue necessaria . Ciba me quoque pane vitae et intellectus , et pota me aqua sapientiae salutaris ; sunt enim dulcia faucibus meis eloquia

tua super mel ori meo . Frange insuper esurienti Animae meae panem suum : panem Angelorum : panem de Coelo verum : non sicut manducaverunt Patres nostri manna , et mortui sunt ; sed carnem Filii tui , quae vere est cibus ; et sanguinem ejus qui vere est potus ; ut manducans hunc panem vivam in aeternum .

*Et dimitte nobis debita nostra .* Reminiscere miserationum tuarum Domine , et misericordiarum tuarum , quae a saeculo sunt : Qui proprio Filio tuo non pepercisti , sed pro nobis omnibus tradidisti illum , delicta juventutis meae , et ignorantias meas ne memineris ; sed propter Nomen Sanctum tuum propitiare peccato meo , multum est enim .

*Sicut et nos dimittimus debitoribus nostris .* Quoniam dilectus Filius tuus dixit nobis : Diligite inimicos vestros ; ut sitis Filii Patris vestri : et commendans charitatem suam in nobis ; ad te oravit in Cruce ; Pater , dimitte illis : et pro

nobis mortuus est , cum adhuc peccatores essemus ; cupio et ego anathema esse etiam pro fratribus meis , qui odio habuerunt me gratis , et odio iniquo oderunt me . Dimitto Domine , ut dimittatur mihi . Fac ut sim misericors , sicut et tu Pater noster misericors es ; si enim dimiserimus hominibus peccata eorum , dimittes et nobis Pater noster coelestis delicta nostra .

*Et ne nos inducas in tentationem .* In Filio tuo eripiar à tentatione , qui est tentatus per omnia pro similitudine absque peccato . Sis mihi à dextris Domine , ne commovear , ut , cum probatus fuero , accipiam coronam vitae . Serva me ab hora tentationis misericors Deus : et agnosce creaturam , non à diis alienis creatam : sed à te solo Deo vivo , et vero , quia non est alius Deus praeter te , et non est secundum opera tua .

*Sed libera nos à malo .* Quoniam comprehenderunt me iniquitates meae , circumdederunt me mala , quorum

non est numerus : et pericula Inferni invenerunt me ; sed tu Domine , adjutor meus , et liberator meus es tu . Viam igitur iniquitatis amove à me : et amove a me plagas tuas : et libera me , quoniam speravi in te . Propterea si consistent adversum me castra , non timebit cor meum : si exurgat adversum me praelium , in hoc ego sperabo . Quia tu Domine fortitudo mea , refugium meum , spes mea à juventute mea ; super aspidem et basiliscum ambulabo , et conculcabo leonem et draconem : et in Domino sperans non infirmabor .

Haec omnia peto in Nomine Unigeniti Filii tui , qui dixit : Quodcumque petieritis Patrem in nomine meo , dabit vobis . Amen .



## II.

## HORAE CANONICAE

*Ad Primam .*

**T**u Domine Deus , miserator , et misericors , possedisti me in initio viarum tuarum , antequam quidquam faceres à principio ; charitate enim perpetua dilexisti me : et attraxisti me miserans in funiculis Adam , in vinculis charitatis : Vocasti me quoque in Sanctuarium tuum , ut lucerem super candelabrum omnibus , qui in domo sunt . Ecce ego Domine , quia vocasti me . Da ut sim vigilans usque ad mortem , et confirmem caeteros : nec obliviscar Testamenti tui . Da has leges in corde meo , et in mente mea eas subscribe ; ut ambulem digne vocatione , qua vocatus sum à diebus antiquis : ut gratia tua in me non sit vacua ; ut omnia opera mea sint plena coram te Deo meo : ut non relinquam charitatem primam , ne inci-

pias me evomere ex ore tuo . Te-  
neam Domine , quod habeo , ne alter  
accipiat coronam meam .

*Hora Tertia .*

**D**omine Deus meus , qui hora  
diei tertia super discipulos tuos ,  
perseverantes unanimiter in oratio-  
ne cum mulieribus , et Maria matre  
tua , et fratribus tuis , expectantes  
promissionem Patris , quam audie-  
rant per os tuum , misisti Spiritum  
Sanctum tuum , ut essent tibi testes  
in Jerusalem , et in omni Judaea ,  
et Samarîa , et usque ad ultimum  
Terrae ; effunde super me , et su-  
per omnem carnem de Spiritu San-  
cto tuo . Repleat Domine cor meum ,  
et mentem meam , sicuti replevit totam  
domum , ubi erant sedentes Discipuli  
tui : Veniat è Coelo ignis tuus san-  
ctus , quem venisti mittere in ter-  
ram , ut accendatur ; ut accipiens  
virtutem supervenientis Spiritus San-  
cti in me , possim loqui magnalia  
tua : sicuti apparuerunt illis disper-

titae linguae , tanquam ignis , seditque supra singulos eorum , et repleti sunt omnes Spiritu Sancto , et coeperunt loqui , prout Spiritus Sanctus dabat eloqui illis . Emitte Spiritum tuum , et creabuntur : et renovabis faciem terrae . Induar Domine virtute ex alto , ut possim loqui cum fiducia verbum tuum . Veniat Spiritus veritatis , qui doceat me omnem veritatem , et quae ventura sunt annuntiet mihi : qui suggerat mihi quodcumque dixisti : qui clarificet te , et testimonium perhibeat de te , ut testimonium ego perhibeam , quia tecum sum . Mitte Spiritum tuum in corda filiorum tuorum clamantem , Abba Pater , Spiritum adoptionis , ut natus ex Spiritu , Spiritus sim , et non caro . Fiat cor meum Templum Dei vivi , et Spiritus Sanctus habitet in me , et operetur in me , qui operatur omnia in omnibus dividens singulis prout vult ; ipse deducat me in , viam rectam , qui enim Spiritu Dei aguntur , ii sunt Filii Dei . Fac ut au-

diam vocem Spiritus , qui nbi vult spirat , ut adhaerens tibi unus Spiritus tecum sim . qui unum es cum Patre tuo , et eodem Spiritu Sancto in saecula etc. *Veni Sancte Spiritus etc. cum Sequentia.*

*Hora Sexta'.*

**D**ominator vitae meae Deus meus , ordinatione tua perseverat dies , quia omnia serviunt tibi . Oritur Sol , et occidit , et ad locum suum revertitur , ibique renascens gyrat per meridiem , et flectitur ad aquilonem , lustrans universa . Vespere igitur , mane , et meridie narrabo , et annuntiabo , et exaudies vocem meam . Oculi tui Domine super timentes te , protector potentiae ; firmamentum virtutis , tegimen ardoris , et umbraculum meridiani . Indica mihi , quem diligit anima mea , ubi pascas , ubi cubes in meridie . Donec aspiret dies , et inclinentur umbrae , vadam ad montem mirrhae , et ad collem tha-



ris . Consurgam , et ascendam in meridie in palmam , et apprehendam fructus ejus : contemplabor eum , qui hora sexta crucifixus , et cum sceleratis reputatus est . Aspiciam Dilectum , qui pendens in ligno non habet ubi reclinet caput suum . Sub umbra illius , quem desideraveram , sedebo , et fructus illius dulcis gutturi meo . Stabo juxta Crucem , et hauriam aquas in gaudio de fontibus Salvatoris , et miserationum Domini recordabor . O Sol justitiae , qui occidisti in meridie , et tenebrescere fecisti terram in die luminis , ne occidas ultra super me , sed sis mihi in lucem sempiternam , et Deus meus in gloriam meam . Amen .

### *Hora Nona .*

**D**omine Deus meus formans lucem , et creans tenebras , considera quod dies declinior sit ad occasum , et propinquet ad vesperam , mane apud me etiam hodie , ut ducam laetam diem . Da ut reliquum hujus

**b**

diei, et vitae meae cum gaudio sit, et cum bono profectu timoris tui, ut testimonium praebeam in conspectu tuo, et Jesu Christi Filii tui, ut ornem tempora usque ad consummationem vitae, et laudem Nomen Sanctum tuum, et amplificem tuam sanctitatem, donec videam te Deus meus, cui gloria nunc, et in diem aeternitatis.

Et nunc Domine ascendo ad horam orationis nonam, memor Sanctissimae Mortis tuae, quando hora nona exclamasti: Deus Deus meus, ut quid dereliquisti me? et cum accepisses acetum dixisti: Consummatum est; et commendans Patri Spiritum tuum, iterum clamans voce magna expirasti. Ne derelinquas me Domine, et respice me in hora tribulationis, et transitus mei. Ad te clamabo, ut salvus sim: in te sperabo, ut non sim confusus. In manus tuas, o bone Jeshu, commendo Spiritum meum, a quo emptus sum pretio tam magno. Memento mei, dum veneris in Regnum tuum: fac

ut audiam ex ore tuo quod conversus ad Latronem in Cruce pendentem dixisti: Hodie mecum eris in Paradiso; ut intraas in gloriam tuam glorificem te cum Patre tuo, et Spiritu Sancto in saecula saeculorum. Amen.

*Recitetur Psal. 21. in memoriam Passionis Dominicae.*

### III.

#### ANTE SACRUM.

**D**omine Deus, omnium Creator, Terribilis, et Fortis, Justus, et Misericors, qui sedes super excelsum Thronum, et glorificas Majestate Domum Sanctam tuam, suscipe de manibus meis in oblationem suavissimi odoris Corpus, et Sanguinem pretiosi Agni, et immaculati Unigeniti Filii tui Domini nostri Jesu Christi, quem hodie offero tibi Omnipotenti Deo excelso in loco isto, quem elegisti in Domum Sacrificii; Deduc me in montem sanctum tuum, et lae-

tifica me in domo orationis meae,  
et placeat tibi hoc Sacrificium dile-  
cti Filii tui, per quem est tibi glo-  
ria in Ecclesia in omnes generatio-  
nes. Qui cum in forma Dei esset,  
exinanivit semetipsum, formam servi  
accipiens in similitudinem hominum  
factus, et habitu inventus ut homo:  
et humiliavit semetipsum usque ad  
mortem, mortem autem Crucis. Haec  
est illa oblatio munda, quae offer-  
tur Nomini Sancto tuo, quod est glo-  
riosum, et terribile. Adorent te,  
Deus Pater omnipotens, et laudent  
Angeli tui, qui sunt in circuitu Thro-  
ni ante sublime Altare tuum, et co-  
ram Agno, qui occisus est, et re-  
demit nos in Sanguine suo. qui di-  
gnus est accipere virtutem, et di-  
vinitatem, et sapientiam, et forti-  
tudinem, et honorem, et gloriam,  
et benedictionem. Veniant itaque  
omnes gentes, et adorent coram te  
Domine, quia tu es Deus solus, in  
universa terra. Offerat universa mul-  
titudo hoc holocaustum, et Sacrifi-  
cium laudis tuae mente devota, que-

nammodum ipse Unigenitus Filius tuus obtulit seipsum immaculatum tibi Patri suo , Deo viventi , et quotidie se offert super placabile Altare tuum in holocaustum sempiternum .

Per ipsum offerimus etiam Domine Pater Sancte nos ipsos spirituales hostias , qui mortuus est , ut nos offerret tibi Deo vero , ut essemus in laudem , et gloriam tuam . Utinam exhibeamus nosmetipsos Sanctos , et immaculatos , et irreprehensibiles coram te Hostiam viventem , sanctam , beneplacentem , rationabile obsequium nostrum , ut oblatio nostra sit odor suavissimus in conspectu tuo . Tu ergo Domine Deus omnipotens , cui est acceptum sacrificium Justorum , accipe me quasi in Hostiam Holocausti : ut vivam jam non ego , vivat vero in me Christus , qui dilexit me , et tradidit semetipsum pro me : ut vita mea sit abscondita cum Christo in te Deo Patre , qui cum eodem Filio tuo , et Spiritu Sancto vivis et regnas in saecula saeculorum . Amen .

Memores etiam Domine miserationum tuarum , et multitudinis bonorum , quae largitus es nobis secundum indulgentiam tuam , et secundum multitudinem miserationum tuarum ; gratias agimus tibi sine intermissione , et colimus te ; Omnipotens aeternae Deus , in hostiis , et muneribus . Tu dedisti nobis Unigenitum Filium tuum , qui dilexit , et lavit nos in sanguine suo : factus nobis Justitia , Sanctificatio , et Redemptio . Mediator novi Testamenti , Pontifex futurorum bonorum , Sanctorum Minister , et Tabernaculi veri ; qui , cum sit Sacerdos in aeternum secundum ordinem Melchisedech , in qua nocte tradebatur , accepit panem , et gratias agens fregit , ac dixit : Accipite , et manducate : hoc est Corpus , quod pro vobis tradetur ; hoc facite in meam commemorationem . Similiter accepto Calice postquam coenavit dicens : Hic Calix Novum Testamentum est in meo Sanguine ; hoc facite quotiescumque bibetis in meam commemorationem .

Tu antem Domine , qui proprio Filio non pepercisti , sed pro nobis omnibus tradidisti illum , quomodo non etiam cum illo omnia nobis donasti ? Et nos quidem de plenitudine ejus accepimus , repleti fructu Iustitiae per eum , in quo habitat omnis plenitudo Divinitatis corporaliter . Gratias igitur agentes super hoc inenarrabili dono tuo , et caeteris donis tuis offerimus tibi hoc Sacrificium Recordationis : eundem scilicet Unigenitum Filium tuum Dominum Nostrum Jesum Christum , ut sit memoriale in aeternum super Altare tuum in odorem suavissimum in conspectu Divinae Majestatis tuae .

Accedo etiam Domine ego humilis servus tuus , quem constituisti Sacerdotem , ad offerendum munera , et hostias pro peccatis meis , et pro delictis Populi , ad Altare tuum cum vero corde , et plenitudine fidei , ut offeram Divinae Majestati tuae placabilem Hostiam in hac domo Propitiationis , eundem Filium tuum Unigenitum Dominum Nostrum Jesum Chri-

stum, qui est Propitiatio pro peccatis nostris; non pro nostris autem tantum, sed etiam pro totius Mundi. Qui cum maneat in aeternum, sempiternum habet Sacerdotium; unde et salvare in perpetuum post accedentes per semetipsum ad te Deum vivum, semper vivens ad interpellandum pro nobis. Talis enim decebat ut nobis esset Pontifex, Sanctus, innocens, impollutus, segregatus à peccatoribus, et excelsior coelis factus; Qui non per Sanguinem hircorum, et vitulorum, sed per proprium Sanguinem introivit semel in Sancta, aeterna Redemptione inventa. Si enim sanguis hircorum, et taurorum, et cinis vitulae aspersus inquinatos sanctificabat ad emundationem carnis; quanto magis Sanguis Christi, qui per Spiritum Sanctum semetipsum obtulit immaculatum Deo, emundabit conscientiam nostram ab operibus mortuis ad serviendum Deo viventi? Hic est Sanguis Testamenti, in quo sanctificati sumus, quem voluit offerri usque ad consummationem sae-



culi ad placandum te Deum Patrem suum pro peccatis , et delictis Populi sui . Accedamus igitur ad Testamenti novi Mediatorem Jesum Christum , et Sanguinis aspersionem melius loquentem , quam Abel .

Protector noster aspice Deus , et respice in faciem Christi tui , qui peccata nostra pertulit in Corpore suo super lignum : ut peccatis mortui justitiae vivamus , cujus livore sanati sumus , per quem placuit tibi reconciliari , omnia in ipsum pacificans per Sanguinem Crucis ejus , sive quae in Terris , sive quae in Coelis sunt . Propitiare ergo Domine Populo tuo , qui peccavit tibi , omnibus iniquitatibus eorum , qui praevaricati sunt in terra , et da misericordiam coram eis ; non enim corruptilibus auro , vel argento redempti sumus , sed pretioso Sanguine , quasi Agni immaculati Christi , et incontaminati , - quem humiliter offero super Altare tuum , in quo habemus Redemptionem , et remissionem peccatorum secundum divitias

gratiae ejus . Pone etiam misericors Deus lacrymas nostras in conspectu tuo : et sit tibi acceptabile Sacrificium cordis nostri ; quod tibi offerimus contritum , et humiliatum per eundem Christum , Unigenitum Filium tuum . Amen .

Respice Domine Deus Omnipotens de Sanctuario tuo , et de excelso Coelorum habitaculo , respice ad orationem servi tui , et ad preces ejus . Audi orationem , quam servus tuus orat coram te , et suscipe hoc Sacrificium de manibus meis pro universo Populo tuo in Ecclesia , quam acquisisti Sanguine Filii tui ; ut omnes hauriamus aquas in gaudio de fontibus Salvatoris . Per ipsum ad te accedo ; qui in diebus carnis suae preces, supplicationesque offerens cum clamore valido , et lacrymis , exauditus est pro sua reverentia ; Qui dedit nobis Spiritum adoptionis filiorum in quo clamamus , Abba Pater ; Qui cum sit ad dexteram tuam , etiam nunc interpellat pro nobis . Rogat te Populus tuus Dominum ex-

celsum in prece , usquedum perfectus sit honor tuus , et munus in consummatione sanctae oblationis , quae est in manibus meis .

Domine Deus omnium , qui magna fecisti in omni terra , qui auxisti dies nostros a ventre matris nostrae , et fecisti nobis secundum misericordiam tuam ; memor sis Sacrificii nostri : et fac in nobis secundum omnem bonitatem , et secundum omnem miserationem tuam . Da nobis jucunditatem cordis , et fac pacem in diebus nostris per dies sempiternos .

Angelus etiam Sanctus tuus , qui stat ante Altare tuum , offerat preces nostras super hoc Altare : et ascendat fumus incensorum de orationibus nostris coram te .

Propter Christum , qui dilexit Ecclesiam , Sponsam suam , et seipsum tradidit pro ea , ut eam sanctificaret : mundans eam lavacro aquae in verbo vitae , ut exhiberet ipse tibi gloriosam Ecclesiam , non habentem maculam , aut rugam , aut aliquid ejusmodi , sed ut sit Sancta , et imma-

culata ; protege Deus meus universam Ecclesiam tuam , in qua habitat Genus electum , regale Sacerdotium , Gens Sancta , Populus acquisitionis , fundatam super firmam petram , qui est Christus , Caput et Salvator Corporis ejus ; ut omnes Unum simus in ipso , qui de uno Pane , et Calice participamus.

Aliae sunt oves , Domine , quae non sunt ex hoc Ovili : et illas etiam oportet adducere . Convertantur Domine ad Patrem Magnum Ovium Episcopum animarum nostrarum : et fiat unum Ovile , et unus Pastor .

Protege eos Domine , quos Spiritus Sanctus posuit Episcopos regere Ecclesiam tuam : Et quem praecipue constituisti Summum Sacerdotem Gentis tuae , ut seipsos praebeant in omnibus exemplum bonorum operum in Doctrina , et Integritate , et Gravitate .

Oramus etiam te Domine pro Regibus , et omnibus , qui in sublimitate stant , et gladium portant ; sunt enim Ministri tui .

Aperti sint oculi tui super hanc Civitatem, et muro tuo inexpugnabili illam circumcinge, et da pacem in diebus nostris, quia non est alius, qui pugnet pro nobis, nisi tu Deus noster. Propitiare Domine Terrae nostrae: et cohibe omnes plagas a gente nostra. Si irruerint super nos mala, gladius iudicii, pestilentia, et fames, stabimus coram Domino hac in conspectu tuo, in qua invocatum est Nomen tuum, et clamabimus ad te in tribulationibus nostris, et exaudies, salvosque facies.

Respice etiam servos tuos, quos vocasti fidelis Deus in Societatem Filii tui, ut simus Sancti, et immaculati in conspectu tuo: radicati, et fundati in charitate, ut eamus, et fructum afferamus, et fructus noster maneat. Nemini dantes ullam offensionem, ut non vituperetur ministerium nostrum; ut is qui ex adverso est vereatur, nihil habens malum dicere de nobis.

Respice super hanc Domum tuam, in qua invocatur Nomen tuum: et

ne cogites super illam malum . Universae facultates nostrae , et familiae in conspectu tuo sunt . Sint omnia nostra sub lege tua : Nos et filii nostri servi tui sumus . Errantes oves ex nobis reduc in viam salutis , propter quas bonus Pastor animam suam posuit .

Rogamus te Domine pro iis , qui nobis beneficiunt : qui tribulato sunt corde : qui odio iniquo oderunt nos : qui in agone contendunt : denique pro iis , qui cum pietate dormitionem acceperunt , pro quibus offero hoc Sacrificium Redemptionis , et victimam salutis , ut ingrediantur Civitatem illam , Jerusalem novam Ecclesiam Primitivorum , in quam non intrat aliquid coinquinatum , nisi qui scripti sunt in libro vitae Agni .

Appropinquo igitur Domine ad Altare tuum , ut ministrem in Sanctuario tuo : fac me Sacerdotem sine macula , habentem voluntatem in lege tua . Indue me veste sancta in gloriam , et decorem vestimentis salutis , et indumento justitiae circumda

me . Sanctifica offerentis manus , quas consecrasti in die unctionis suae , ne polluam Sanctuarium tuum ; sed levem eas pure in ascensu Altaris sancti cum oblatione Excelsi Regis . Sanctifica cor meum , in quo posuisti tabernaculum tuum , ut sit Templum Dei vivi : et reple me coelesti benedictione , et gratia in Filio tuo Jesu Christo , ut sim sanctus corpore , et spiritu per oblationem Corporis sui .

Aperiantur Coeli , et Angeli tui Deus ascendant in hac hora super Filium hominis . Veniat ignis tuus de Coelo , qui est Spiritus Sanctus , et descendat super hoc Altare tuum ; quemadmodum aperti sunt Coeli , et descendit super Filium tuum sicut Columba , et mansit super eum , et vox tua intonuit : Hic est Filius meus dilectus , in quo mihi bene complacui ; ut ipse quoque repletus Spiritu Sancto unum sim tecum , qui unus es Deus cum Filio tuo , et cum eodem Spiritu Sancto per saecula saeculorum . Amen .

Adsit gratia plena Virgo , et Mater Unigeniti Filii tui Maria , et offerat tibi Deus omnipotens in hac hora Jesum , benedictum fructum ventris sui , quem tulit olim in Jerusalem , ut sisteret eum coram te Domine ; et , dum emitteret spiritum , stabat juxta Crucem , et nunc assistit Regina à dextris ejus . Inveniat igitur gratiam in conspectu tuo servus tuus per eam , quae invenit gratiam coram te . Amen .

*Ante Communionem  
Sacramentalem.*

**T**empus tuum Domine prope est , ut facias pascha cum Servo tuo . Angelorum esca nutris populum tuum , et paratum Panem de Coelo praestas , ac sine labore omne delectamentum in se habentem , et omnis saporis suavitatem . Ecce in Altari tuo Convivium pinguium , Convivium vindemiae , Manna absconditum , quod nemo scit , nisi qui accipit non indigne : Mel bonum , et favum dulcis-



simum gutturi meo: Vere, o bone Jesu, cum dilexisses tuos, qui erant in Mundo, in finem dilexisti eos. Tu es Panis vitae. Patres nostri manducaverunt manna in deserto, et mortui sunt. Tu es Panis vivus, qui de Coelo descendisti; Si quis manducaverit ex hoc pane, vivet in aeternum: et Panis, quem tu dabis, Caro tua est pro Mundi vita. Caro tua vere est cibus, et Sanguis tuus vere est potus: qui manducat tuam Carnem, et bibit tuum Sanguinem, in te manet, et tu in illo. Sicut misit te vivens Pater, et tu vivis propter Patrem: ita et qui manducat te vivet propter te.

Sed quis ego sum Domine, ut intrem in Convivium tuum? Quid est homo, quod memor es ejus, aut filius hominis, quoniam visitas eum? Ego pulvis, et cinis: putredo, et vermis. Domine, non sum dignus ut intres sub tectum meum, sed tantum dic verbo, et sanabitur Anima mea. Sed licet tam miser sim, et contemptibilis valde, tu clamare non

desinis, et invitare ad Coenam magnam pauperes; debiles, et claudos. O benignitas, et humanitas Salvatoris nostri Dei! Sitivit igitur Anima mea quam multipliciter tibi caro mea. Quemadmodum Cervus ad fontes aquarum, ita desiderat anima mea ad te Deus. Sitivit anima mea ad Deum fortem vivum; quando veniam, et apparebo ante faciem Dei? Quis mihi det, ut inveniam te foris, et deosculer te? Rorate Coeli desuper et nubes pluant Justum: aperiatur terra, et germinet Salvatorem. Inclina Domine Coelos tuos, et defende: excita potentiam tuam, et veni, ut salvum me facias. Veni Domine, veni, et noli tardare. Ecce Sponsus venit, exite obviam ei, gustate, et videte quoniam suavis est Dominus. Aperti sint oculi mei, et cognoscam te Jesu Praeceptor in fractione Panis. Ego dilecto meo, et dilectus meus in sinu meo. Fiat igitur salus, et pax huic domui, quam visitat Dominus.

- „ Contritio de peccatis , et negligentiis ; et Confessio praemittenda .  
 Intentio rectificanda .  
 Christi Passio memoranda . . . . .  
 Amor excitandus : . . . . .  
 Humilitas procuranda . . . . .  
 Suffragia Sanctorum requirenda . , ,

### GRATIARUM ACTIO.

**N**umquid potest homo abscondere ignem in sinu suo , ut vestimenta illius non ardeant ? De ore tuo lampades procedunt , o bone Iesu , sicut taedae ignis accensae . Halitus tuus prunas ardere facit , et flamma de ore tuo egreditur ; non est qui se abscondat à calore tuo .

Recede à me Domine , quia homo peccator sum ; et unde hoc mihi ; ut veniat Dominus meus ad me ? Quid est homo , quia magnificas eum , aut quid apponis erga eum cor tuum ? Domine Dominus noster , quam admirabile est Nomen tuum in universa terra ! Diligam te Domine fortitudo mea : Dominus meus ,

et Deus meus . Ecce Deus , Salvator meus : fiducialiter agam ; et non timebo . Sanctus , Sanctus , Sanctus , Dominus Deus Sabaoth , Benedictus qui venit in nomine Domini : Hosanna Filio David . Tu es Christus , Filius Dei vivi . O Rex Israel Salvator .

Benedic Anima mea Domino : et omnia , quæ intra me sunt , Nomini Sancto ejus . Benedictus Dominus Deus Israel . Magnificat anima mea Dominum , etc. Magnus Dominus , et laudabilis nimis , et magnitudinis ejus non est finis : excelsus , et immensus . Exultavit cor meum in Domino : et exultavit anima mea in Deo meo .

Inveni quem diligit anima mea : tenui eum , nec dimittam . Non dimittam te Domine , donec benedixeris mihi . O bone Jesu , dives in omnes , qui invocant te : qui venisti non vocare justos , sed peccatores : qui pertransibas benefaciendo , et sanando omnes . Quis potest facere mundum de immundo conceptum semine , non ne tu , qui solus es ?

Domine, si vis potes me mundare.  
 Amplius lava me ab iniquitate mea;  
 et a peccato meo munda me. Cor  
 mundum crea in me Deus.

Ecce quem amas infirmatur; Mi-  
 serere mei, quoniam infirmus sum.  
 Tu venisti in me, ut curares me.  
 Sit igitur dimissus ab infirmitate sua  
 servus tuus, qui tenetur magnis fe-  
 bribus. Jesu, fili David, miserere  
 mei. Dic animae meae: Quid tibi  
 vis faciam? Domine ut videam: ut  
 agnoscam te Deum meum, qui es  
 intra me, speciosus forma prae filiis  
 hominum.

Stabo hic secus pedes tuos Domi-  
 ne, audiens verbum tuum, et illud  
 confereus in corde meo. Domine,  
 ad quem ibimus? verba vitae aeter-  
 nae habes. Sermo tuus veritas est.  
 Domine, quid me vis facere? Pa-  
 ratum cor meum Deus, paratum cor  
 meum: Sonet igitur vox tua in auri-  
 bus meis. Vocabis me, et ego re-  
 spondendo tibi.

Trahe me post te in odorem unguen-  
 torum tuorum. Oleum effusum Nomen

tuum : Myrrha , et gutta , et casia a vestimentis tuis ; Odor vestimentorum tuorum , sicut odor thuris , et sicut odor agri pleni , cui benedixit Dominus . O quam suavis es Domine manducantibus te . Pinguis est Panis tuus , et praebebit delicias Regibus . Manducavi Panem meum cum melle meo ; et bibi Vinum cum lacte meo ; Vinum , Domine Jesu , Sanguinem tuum , quem das iis , qui amaro sunt corde , ut bibant , et obliviscantur egestatis suae ; et doloris sui non recordentur .

Si tetigero tantum fimbriam vestimenti ejus , salvus ero . Stabo ad pedes Domini , et osculabor pedes ejus . Dic animae meae ; Infer digitum tuum hic , et vide : Mitte manum tuam in latus meum : et noli esse incredulus , sed fidelis .

Mane in me , Domine Jesu , et ego in te , ut feram fructum multum , fructus nempe spiritus : Charitatem , ut diligam te , qui prior dilexisti me : diffusam in corde meo etiam propter eos , qui haereditatem ca-

piunt salutis ; ut defectio teneat me pro peccatoribus, derelinentibus legem tuam . Gaudium , ut exultem in te Deo meo , vivo , et vero . Pacem , quam das in medio cordis mei , quo modo stetisti in medio Discipulorum ; dicens : Pax vobis : Ego sum : nolite timere . Patientiam in adversis : Expectans te , et viriliter agens ; ut confortetur cor meum , sustinens te Dominum . Benignitatem , induens viscera misericordiae erga fratres meos . Bonitatem , sienti bonus es tu , qui solem tuum oriri facis super bonos , et malos ; et pluis super justos , et injustos . Longanimitatem , de mane usque ad vesperam diligens te , omnibus diebus vitae meae in longitudinem dierum ; etiam mortificatus propter te tota die , et factus sicut ovis occisionis . Mansuetudinem , discens a te , qui mitis es , et humilis corde . Fidem , quae per dilectionem operetur . Modestiam , quae nota sit omnibus hominibus ; tu enim Domine , non tantum prope , sed intra me es . Continentiam , qua cru-

cifgam carnem meam cum concupiscentiis suis . Castitatem , ut exhibeam tibi cor mundum , qui pasceris inter lilia ; et lilia colligis ; et sic inhabites in me , ut vivam ego jam non ego , vivas tu vero in me Domine Jesu , qui cum Patre , et Spiritu Sancto vivis , et regnas Deus per saecula saeculorum . Amen .

„ Christus hospes humiliter amplexandus .

Beneficium visitationis ipsius attente considerandum .

Infinita erga se ejusdem bonitas admiranda .

Imparitas sua ad gratiarum actiones digne reddendas agnoscenda .

Deo Patri ejus Filius dilectus offerendus .

Totum , quod in se est , Sanctissimae Trinitati , et Beatae Virgini Mariae consecrandum .

Necessitates propriae , et Proximi Christo Domino reverenter aperiendae .

Gratia Dei suppliciter petenda .



Vota ex intimo Cordis renovanda . Proponendum . ,

*Precatiuncula Sacerdotibus quotidie legenda , ut in dies Deo ferventius deserviant . Ex Thoma a Kempis , de imitatione Christi .*

**A**djuvanos gratia tua, omnipotens Deus , ut qui officium Sacerdotale suscepimus , digne , ac devote tibi omni puritate , et in conscientia bona famulari valeamus .

Et si non possumus in tanta innocentia vitae conservari , ut debemus ; concede nobis tamen , digne flere mala , quae gessimus , ut in spiritu humilitatis , ut bonae , voluntatis proposito tibi ferventibus deservire valeamus . Amen .

*IN ADORATIONE*

## SANCTISSIMAE EUCHARISTIAE

ET VISITATIONE BEATAE  
MARIAE VIRGINIS .

**Q**uis poterit stare in conspectu vultus tui omnipotens Deus Altissime , et in conspectu ardoris tui . Quis poterit subsistere ? Ergo ne credibile est ut habitet Deus cum hominibus super terram ? Si Coelum , et Coeli Coelorum non te capiunt , quanto magis domus ista ? Tu Domine Deus universorum , qui nullius indiges , voluisti Templum habitationis tuae fieri in nobis . Posuisti Tabernaculum tuum in medio nostri , et habitas nobiscum : nos populus tuus , et tu Deus noster . Vere tu es Deus absconditus , Deus Israel , Salvator , Gloria Templi , et Altaris tui : Qui habes in Coelis habitationem , elegi-

sti Sanctuarium in loco isto , ut sis ibi nobiscum in perpetuum . Prope est Dominus invocantibus eum ; invocantibus eum in veritate ; nec est alia Natio tam grandis , quae habeat Deos appropinquantes sibi , sicut Deus noster .

Beati Viri tui , et beati Servi tui , qui assistunt coram te omni tempore , et circumdant Altare tuum , Dominator omnis terrae : et conversantur tecum , qui in terris visus es , et cum hominibus conversatus es : non enim habet amaritudinem conversatio tua , nec taedium convictus tuus ; sed laetitiam , et gaudium .

Exinanisti Domine temetipsum , et deliciae tuae esse cum filiis hominum utinam deliciae meae esse cum filio Dei ! Quam pulchra tabernacula tua Jacob , et tentoria tua Israel ! ut valles nemorosae , et horti juxta fluvios irrigui ; ut tabernacula , quae fixit Dominus , quasi Cedri prope aquas .

O Israel , quam magna est Domus

Dei , et ingens locus possessionis ejus ! Magnus est , et non habet finem : excelsus , et immensus .

Quam dilecta Tabernacula tua Domine virtutum ! Concupiscit , et deficit anima mea in atria Domini . Cor meum , et caro mea exultaverunt in Deum vivum . Exulta , et lauda habitatio Sion , quia magnus in medio tui Sanctus Israel . Confortare omnis populus terrae ; quoniam Deus noster nobiscum est in Templo Sancto suo : et repletur domus haec sancta gloria Majestatis ejus . Hic est Deus noster : et non aestimabitur alius adversus eum . Domine dilexi decorem domus tuae , et locum habitationis gloriae tuae . Gaudens gaudebo , et exultabit anima mea in Deo meo .

Quis non timebit te Domine , et magnificabit Nomen tuum ? Ecce omnes Angeli , qui serviunt tibi die ac nocte in Templo tuo , stant in circuitu Throni , et cadunt in conspectu Throni in facies suas , et adorant te Deum viventem in saecula saeculorum . In

conspectu igitur Angelorum psallam  
 tibi, Deus meus, adorabo ad Tem-  
 plum sanctum tuum, et confitebor  
 nomini tuo. Dignus enim es Domine  
 Deus noster accipere gloriam, et  
 honorem, et virtutem, et benedi-  
 ctionem, quia tu creasti omnia, et  
 propter voluntatem tuam erant, et  
 creata sunt. Tu es Agnus, qui oc-  
 cisus es, et redemisti nos in San-  
 guine tuo, et fecisti nos Deo nostro  
 Regnum, et Sacerdotes. Tu es Deus  
 solus Regum omnium terrae, Rex  
 Regum, et Dominus Dominantium.  
 Benedictus igitur in Templo Sancto  
 gloriae tuae: et laudabilis, et glo-  
 riosus in saecula. Gaudium et laeti-  
 tia coram Altari tuo: gratiarum  
 actio, et vox laudis. Intrent in con-  
 spectu tuo omnes gentes in exulta-  
 tione, et psalmis, et hymnis, et can-  
 tibus spiritualibus, cantantes, et psal-  
 lentes in cordibus suis in hoc atrio  
 sancto tuo: ubi est etiam multitudo  
 Militiae coelestis, laudantium te, et  
 dicentium: Gloria in altissimis Deo:  
 et in terra pax hominibus bonae vo-

luntatis . Haec sit vox exultationis ,  
et salutis in tabernaculis Justorum .  
Glorificent te Domine quantumcum-  
que potuerint , supervalebis enim  
adhuc : et admirabilis magnificentia  
tua . Benedicant te Domine quantum  
possunt : major enim es omni laude .  
Laudationem Domini loquetur os me-  
um : et benedicat omnis caro Nomi-  
ni Sancto ejus in saeculum , et in  
saeculum saeculi . Venite adoremus ,  
et procidamus etc.

Domine Jesu , qui posuisti vela-  
men super faciem tuam , et ponis nu-  
bem vestimentum tuum , ex quo ab-  
scondisti speciem decoris tui : Quis  
est , qui contempletur te ? Sed etiam  
Nubes spargit lumen suum Domine ,  
et gloria tua apparet in nube . Deus  
meus confundor , et erubesco leva-  
re faciem meam ad te : quoniam ini-  
quitates nostrae multiplicatae sunt  
nimis , et delicta nostra venerunt  
usque ad Coelum ; sed servus tuus  
deprecabitur te : et placabilis ei eris ,  
et videbit faciem tuam in jubilo . Ne  
projicias igitur me à facie tua : et

ne expellas me de conspectu Sanctuarii .

Dilecte Jesu , qui stas post parietem nostrum ; respiciens per fenestras , prospiciens per cancellos , ostende mihi faciem tuam , in quam desiderant Angeli prospicere : ut sciam te , et inveniam gratiam coram oculis tuis ; ut videam gloriam tuam , et pulchritudinem candoris tui miretur oculus meus . Ecce tu pulcher es , et decorus , et valde speciosus in splendore tuo . Ad te igitur faciem meam converto ; ad te oculos meos dirigo .

Oculi tui ut lampas ardens ; et tu Domine ignis perpetuus , qui nunquam deficit in Altari , Egrediatur igitur ignis à facie tua , et inflamet corda filiorum tuorum , qui stant in circuitu Mensae tuae . Fiant oculi tui aperti super Servum tuum ; Convertere Domine , et respice in me , sicuti respexisti Mulierem , quae erat in Civitate peccatrix , et lacrymis incipiam rigare pedes tuos ; sicuti respexisti Petrum ter te ne-

gantem ; et flebo amare ; sicuti vidi-  
sti hominem , jacentem in grabato  
suo , et sanus erit Servus tuus ab  
infirmirate sua ; sicuti vidisti Mat-  
thaeum , sedentem in telonio , et re-  
lictis omnibus sequar te Deus meus .  
Emitte lucem tuam , quae me dedu-  
cat in tabernacula tua : ne appa-  
ream vacuus in conspectu tuo ; sed  
praebeam tibi cor meum , et vota  
mea , sicuti stetit Stella supra lo-  
cum , ubi tu eras Puer : et intrantes  
Magi , qui venerant ab Oriente ,  
Domum , invenerunt te cum Maria  
Matre tua : et procidentes adora-  
verunt te : et apertis thesauris suis  
obtulerunt tibi munera Aurum , Thus,  
et Myrrham .

Dominus meus , et Deus meus in  
cujus conspectu sto : in quem nunc  
quoque non videns credo : quem di-  
ligo , et adoro ; et credens exulto  
laetitia inenarrabili , et glorificata ,  
donec videam te in Sion Monte San-  
cto : in Coelo , ubi est Sedes tua ,  
quando elevabitur Nubes de taberna-  
culo : et adimplebis me laetitia cum



vultu tuo in saecula saeculorum .  
Amen .

Nunc autem Domine , cum angustiaretur in me anima mea recordatus sum tui , ut veniat ad te oratio mea ad Templum sanctum tuum . Tu enim nobiscum Domine Deus noster , qui auxiliator es noster , pugnasque pro nobis . Pone igitur me iuxta te , et cujusvis manus pugnet contra me .

Ecce sto in Sanctuario tuo in tabernaculis fiduciae , et effundo animam meam in conspectu tuo . Levo ad te manus meas in loco sancto ; quem elegisti : ut ponas Nomen tuum ibi , et habites in eo : et sciant inimici nostri quia nobiscum es .

Da mihi Domine , ut appaream quotidie ante faciem tuam coram Altari tuo , et maneam ibi jugiter : ut tu Domine mecum maneas in diebus peregrinationis meae , et in aeternum ; et sim securus à facie tua , quando videbo te Filium hominis , venientem in nubibus Coeli cum virtute multa , cum potestate magna , et majestate . Amen .      c 5

## ORATIO

S. EPHREM SYRI,

EX SACRA SCRIPTURA

*Ante Orationem , aut Lectionem  
spiritualem .*

**D**omine Jesu Christe aperi aures , et oculos cordis mei ad audiendum , et intelligendum sermonem tuum , faciendamque voluntatem tuam . Domine , quoniam incola ego sum in terra , non ascondas à me mandata tua . Revela oculos meos , et considerabo mirabilia de lege tua . Incerta et occulta cordis mei , et sapientiae tuae manifesta mihi ; In te enim spes mea Deus , ut tu mentem , atque intellectum meum illumines . Amen .

*AD BEATAM VIRGINEM .**Oratiuncula a beata Geltrude composita ad salutandam B. Virginem .*

**A**ve candidum lilium fulgidae sem-

perque tranquillae Trinitatis, Rosa-  
que praefulgida caelicae amoenitatis ;  
de qua nasci ; et de cujus lacte pa-  
sci Rex Coelorum voluit : divinis in-  
fluxionibus animas nostras pascere .

*In exitu animae suae apparebo illi,  
qui taliter me salutatur in florentia tan-  
tae venustatis ; quod ad miram con-  
solationem sui coelicam amoenitatem  
illi ministrabo ( Cap 19. Vitae, et Re-  
velationi S. Geltr. lib. 3. de devotione  
erga Matrem Domini, et de promptis-  
simo ejus circa se invocantes patro-  
cinio ) Quae multum valet ad Sacerdo-  
talem vitam instituendam .*

**B**enedicta tu a Domino Deo ex-  
celso prae omnibus mulieribus super  
terram . Te elegit Dominus Deus Is-  
rael ut esses Regina, et sederes in  
Throno Regni sui in sempiternum .  
Benedictus Dominus , qui exaltavit  
te , et adornavit plusquam omnes  
mulieres : et habuisti gratiam , et  
misericordiam coram eo : et posuit  
diadema Regni in capite tuo , fecit .

que te regnare . Dominus exaltatio tua , qui contulit tibi splendorem : et ampliavit te , ut incomparabili decore omnium oculis appareres . Tu pulchra nimis , et decora facie . Tu formosa valde . Tu gloria Jerusalem . Tu laetitia Israel . Tu honorificentia populi nostri . Tu speciosissima inter filias , quae placuisti , et invenisti gratiam in conspectu Domini ; qui Nomen tuum ita magnificavit , ut non excidat laus tua ab ore hominum , qui memores fuerint virtutis Domini in aeternum . Tu hortus conclusus : Fons signatus . Favus distillans labia tua : mel , et lac sub lingua tua : et odor vestimentorum tuorum sicut odor thuris . Emissiones tuae Paradisus . Flores tui fructus honoris , et honestatis . In te gratia omnis viae , et veritatis : in te omnis spes vitae , et virtutis . Spiritus tuus super mel dulcis , et haereditas tua super mel , et favum . Memoria tua in generationes saeculorum . Qui edunt te adhuc esurient : et qui bibunt te , adhuc sitient . Qui audit te

non confundetur : et qui sperant in te non peccabunt ; Qui elucidant te , vitam aeternam habebunt .

Tu Mater pulchrae dilectionis , et timoris , et agnitionis , et sanctae spei . Te Dominus quasi Sponsam decoravit corona : et quasi Sponsam ornavit monilibus . Amabilis Domino , eo quod diligat te Dominus , qui te amabilem fecit : ideo es nimis amabilis timentibus te . Tu diligentes te diligis , et thesauros eorum reple : Tecum enim sunt divitiae , et gloria : opes , et justitia . Tu admirabilis in conspectu Potentium , et facies Angelorum mirabuntur te . Vas admirabile : Opus Excelsi : Civitas Regis magni : Templum Dei vivi : Thalamus , ex quo processit Sponsus , qui exultavit ut gigas ad currendam viam . Habitaculum Spiritus Sancti , qui supervenit in te , et obumbravit tibi ; ideoque quod natum est ex te Sanctum , vocatum est Filius Dei . Tu radix Jesse , de qua flos ascendit , qui est flos campi , et lilium convallium : super quem requievit Spiritus Domini .

Dominus possedit te in initio viarum suarum, antequam quidquam faceret à principio. Ab aeterno ordinata es; et ex antiquis antequam terra fieret. Respexit te Dominus Ancillam suam; et beatam te dicunt omnes generationes, quia fecit tibi magna qui potens est. Beata es quae credidisti; quoniam perfecta sunt in te quae dicta sunt tibi à Domino.

Tu Ancilla Domini, et Mater, in qua adimplevit Dominus misericordiam suam, quam promisit domui Israel; et interfecit in manu tua hostem populi sui. Tu illa Mulier, inter quam, et serpentem posuit Deus inimicitias; Contrivisti caput ejus, qui insidiabatur calcaneo tuo; quoniam pulchri sunt gressus tui Filia Principis. Manus Domini confortavit te, et ideo eris benedicta in aeternum. Benedictus Deus omnipotens, qui tradidit hostem in manus foeminae, et confodit eum. Benedictus Dominus, qui fecit Coelum, et Terram; qui te direxit in vulnera capitis Principis inimicorum nostrorum.

Quis potest dicere . Mundum est cor meum ; purus sum à peccato ? Tu , Speculum justitiae , et sine macula tota pulchra es , et macula non est in te , quae nimium placuisti oculis Dei nostri . Tu Civitas Refugii , ad quam venient Gentes ab extremis terrae . Fortitudo nostra , et robur nostrum , et refugium nostrum in die tribulationis . In nomine tuo fiducia fortitudinis ; et filiis tuis eris Spes . Inveniat igitur servus tuus fiduciam , et oret coram te , faciet enim Dominus quidquid tibi placuerit ; et omne , quod petieris ab illo , impetrabis . Voci tuae obediēte Deo , cui obediunt omnia ; ipse enim implet petitiones tuas . Deprecaberis pro me , et liberabis me ab iniquitate mea . Rogabit te populus tuus , ut in aeternum custodias illum ; quae tuam portionem signis evidentibus protegis , quasi Aurora consurgens , et adducens laetam diem his , qui in tenebris , et umbra mortis sedent . Protege igitur Urbem hanc , et Familiam , o terribilis ut castrorum acies

ordinata ; et non sit Satan , neque occursus malus . Protege domum istam , in qua invocatur quotidie Nomen sanctum tuum . et salva eam propter te . Ne retrahas manus tuas ab auxilio servi tui . Ascende cito , et libera me , ferque praesidium ; convenerunt enim adversum me , et circumdederunt me undique inimici mei . Libera me de omni angustia , et da mihi salutem ; in te enim , et in Namine tuo habet servus tuus fiduciam . Pone me in foramine petrae , in latere Jesu Christi Filii tui ; et protege me dextera tua , donec transeam . Quae stabas juxta Crucem Jesu , quando Omnipotens replevit te amaritudine , adsis mihi famulo tuo in hora tribulationis : et da mihi fiduciam , ne timeam in die furoris Domini . Dissolvantur in specie faciei tuae inimici nostri , et deduc me in vitam aeternam : ut , indutus vestimentis laetitiae , videam te , et Jesum Christum , quem beatus Venter tuus portavit , qui beata suxit ubera tua , qui cum Patre , et Spi-



ritu Sancto vivit , et regnat Deus in  
saecula saeculorum . Amen .

V.

EXAMEN CONSCIENTIAE .

*Gratiarum Actio .*

**Q**uid retribuam Domino pro omnibus , quae retribuit mihi ? Benedic anima mea Domino , et omnia , quae intra me sunt , Nomini Sancto ejus . Benedic Anima mea Domino , et noli oblivisci omnes retributiones ejus .

Tu Domine formasti me de limo terrae ad imaginem , et similitudinem tuam . Spiritus tuus Domine fecit me , et Spiraculum Omnipotentis vivificavit me , ut viveret anima mea , et laudaret te : ut recorderer Creatoris mei omnibus diebus vitae meae : ut delectarer in Omnipotente , et invocarem te Deum meum in omni tempore .

Tu Domine , qui bonorum meorum

non eges , conservas me Creaturam tuam , opus manuum tuarum : et das mihi escam in tempore , qui aperis manum tuam , et imples omne Animal benedictione .

Tu Domine regis me , et nihil mihi deest in loco pascuæ , in quo me collocasti : et mandasti Angelis tuis de me , ut custodiant me in omnibus viis meis .

Tu cogitas de me , et tibi est cura de me , qui facis , ut diligentibus te omnia cooperentur in bonum .

Tu vocasti me de tenebris in admirabile lumen tuum ad agnitionem veritatis , ad cognoscendum te solum Deum verum , et quem misisti Jesum Christum .

Tu dedisti propitiationem pro delictis nostris Filium tuum Unigenitum ; qui dilexit , et lavit nos in sanguine suo , quem Advocatum habemus apud te Patrem , et Redemptionem pro peccatis nostris .

Tu dedisti nobis Scripturas Sanctas , per quas spem habeamus , et auxilium in tempore opportuno . Locutus es nobis in Filio , et dedisti

nobis Spiritum Sanctum , qui ex te ,  
et Filio tuo procedit , Spiritum ve-  
ritatis , qui loquitur ad cor nostrum ,  
et testimonium perhibet de te , et  
Filio tuo , Deo vivo , et vero .

Tu elegisti ; et assumpsisti me ,  
ut inhabitarem cum Servis tuis in  
atriis tuis , et replerer in bonis domus  
tuae in Templo tuo , quod Sanctum  
est , et mirabile in aequitate .

Tu suscepisti me de via iniquita-  
tis , et justificasti gratis per gra-  
tiam tuam , per redemptionem quae  
est in Christo Jesu .

Tu liberasti me secundum multi-  
tudinem misericordiae tuae a mani-  
bus quaerentium animam meam : a  
portis tribulationum , quae circum-  
dederunt me : à praessura flammae ,  
quae circumdedit me : et in medio  
ignis non sum aestuatus .

Tu non amovisti orationem meam ,  
et misericordiam tuam à me : sed  
placuit tibi , ut apparerem hodie in  
conspectu tuo , et meditarer eloquia  
tua .

Tu parasti mihi mensam , et de-

disti mihi Panem de Coelo verum ad manducandum , et Vinum germinans Virgines ad hibendum .

Tu elegisti me in Sacerdotem ad sacrificandum tibi quotidie Hostiam laudis , Corpus , et Sanguinem Jesu Christi Filii tui , qui voluit esse nobiscum usque ad consummationem saeculi ; et offerri tibi Deo vivo , et vero in Ecclesia in holocaustum sempiternum, et propitiationem pro delictis populi sui .

Tu denique non projecisti me a facie oculorum tuorum , nec recessisti a servo tuo , nec succidisti arborem non ferentem fructum ; sed sustinuisti me in multa patientia, Deus meus , longaminis , et patiens , et multum miserîcors . Propterea confitebor , et laudem dicam tibi , et benedicam semper Nomini tuo .

*Petitio Luminis .*

**S**ed ego Domine , repletus misericordia tua , retribui tibi mala pro bonis : sterilitatem animae meae ,

spinas, et tribulos germinans tibi. Tu vero, qui consideras vias meas, et cunctos gressus meos dinumeras: quem nulla latet cogitatio, illumina tenebras meas, ut videam quam sim pauper, caecus, et nudus: et sciam quid desit mihi. Revela ignominiam meam; scelera mea, et delicta ostende mihi, antequam manifestetur ante Tribunal tuum, ubi illuminabis abscondita tenebrarum, et manifestabis consilia cordium; antequam pusilli, et magni stent in conspectu Throni, et aperiantur libri, et iudicentur ex his, quae scripta sunt in libris secundum opera ipsorum. Pravum est cor hominis, et inscrutabile. Quis cognoscet illud? Tu, scrutans corda, et renes, Deus.

#### POST EXAMEN.

**N**onne Deus requireret ista? ipse enim novit abscondita cordis; Quomodo non videbit Dominus, nec intelliget Deus Jacob? Qui plantavit aurem non audit, aut qui finxit ocu-

lum non considerat ? Qui corripit gentes , non arguet : qui docet hominem scientiam ? Dominus scit cogitationes hominum , quoniam vanae sunt .

*Confusio .*

**Q**uid faciam , cum surrexerit ad iudicandum Deus ? Et cum quaesierit , quid respondebo illi ? Qui , etiam si habuerim quidquam justum , non respondebo : Sed meum Iudicem deprecabor , et dicam ei : Pater , peccavi in Coelum , et coram te : Jam non sum dignus filius vocari tuus .

Veruntamen iniquitatem meam ego cognosco , et peccatum meum contra me erit semper . Tibi enim soli peccavi , et malum coram te feci . Iniquitatem meam annuntiabo , et cogitabo pro peccato meo .

Recogitabo tibi omnes annos meos in amaritudine animae meae : et exitus aquarum deducunt oculi mei , quia non custodierunt legem tuam .

In abscondito plorabit anima mea

coram Domino, qui fecit me . Plorans plorabit, et oculus meus deducet lacrymas, quia longe factus est à me Consolator, convertens animam meam . Factus sum perditus, quoniam invaluit inimicus. Veruntamen vias meas in conspectu ejus arguam, et ipse erit Salvator meus.

*Justitia.*

**J**ustus es Domine, et omnia judicia tua justa sunt: et omnes viae tuae misericordia, et veritas, Rectus es, et iniquitas non est in te.

Bonum mihi quia humiliasti me, ut discam justificationes tuas. Cognovi Domine, quia aequitas judicia tua, et in veritate tua humiliasti me.

Quoniam non obedi praeceptis tuis, ideo traditus sum in direptionem, et captivitatem. Et nunc Domine magna judicia, quia non ego secundum praecepta tua, et non ambulavi sincere coram te.

Peccavi super numerum arenae ma-

ris , et non sum dignus videre altitudinem Coeli prae multitudine iniquitatis meae , quoniam irritavi iram tuam , et malum coram te feci .

Si justificare me voluero , os meum condemnabit me : et si innocentem ostendero , pravam me comprobabit .

Exacerbavimus te , qui fecisti nos , Deus aeternae , et propter quod ad iracundiam provocavimus Deum , traditi sumus adversariis nostris . Et tu justus es Domine in omnibus , quae venerunt super nos : quia veritatem fecisti , nos autem impiè egimus .

### *Indignatio .*

**H**aeccinae reddis Domino Deo tuo homo stulte , et insipiens ? Numquid non ipse est Pater tuus , qui possidet te , et fecit , et creavit te ? Dereliquisti Deum factorem tuum , et recessisti a Deo salutari tuo ? Oblitus es Dei , qui salvavit te ?

Oblitus es Dei , qui creavit te , et contristasti Nutricem tuam Jerusalem , Ecclesiam Primitivorum , qui



conscripti sunt in Coelis, et ad multorum millium Angelorum frequentiam.

*Timor.*

**A**nte faciem indignationis ejus quis stabit? et quis resistet in ira furoris ejus? Revelabunt Coeli iniquitatem meam, et terra consurget adversus me.

In me transierunt irae tuae, et terrores tui conturbaverunt me. Timor, et tremor venerunt super me, et contexerunt me tenebrae.

Ecce inter Sanctos tuos nemo immutabilis, et Coeli non sunt mundi in conspectu tuo, et in Angelis tuis reperis pravitatem. Quanto magis abominabilis, et inutilis ego sum, qui bibi sicut aquam iniquitatem!

Numquid justificari potest homo comparatus Deo, ut appareat mundus natus de muliere? Ecce Luna non splendet, et Stellae non sunt mundae in conspectu ejus. Quanto magis homo putredo, et filius hominis vermis?

Proinde vereor Domine omnia opera mea , sciens quod non parcas delinquenti . Vae mihi , si abscondas faciem tuam à me , et consideres novissima mea .

Manum tuam longe fac à me , et formido tua non me terreat . Projiciens repulisti me : iratus es contra me vehementer .

Non intres in iudicium cum servo tuo , quia non justificabitur in conspectu tuo omnis vivens .

Numquid in aeternum projiciet Deus ? aut non apponet ut complacitior sit adhuc ? aut in finem misericordiam suam abscindet ? aut obliviscetur misereri Deus ? aut continebit in ira misericordias suas ?

Domine ne in furore tuo arguas me , neque in ira tua corripias me . Ne projicias me à facie tua , et Spiritum Sanctum tuum ne auferas a me .

Recordare quod ego sum pulvis et cinis , et in iniquitatibus conceptus sum , et in peccatis concepit me mater mea .

Tu quidem gressus meus dinumerasti : sed parce peccatis meis .

*Desiderium .*

**Q**uis mihi det , ut sim juxta menses pristinos secundum dies , in quibus Deus custodiebat me ? Quando splendebat lucerna ejus super caput meum , et ad lucem illius ambulabam in tenebris ? Sicuti fuit in diebus adolescentiae meae , quando Deus erat secreto in tabernaculo meo : et Omnipotens erat mecum !

Domine ante te omne desiderium meum : et gemitus meus a te non est absconditus .

Redde mihi laetitiam salutaris tui , et spiritu principali confirma me .

Converte nos Domine ad te , et convertemur : innova dies nostros , sicut à principio .

*Aemulatio .*

**B**eati omnes , qui timent Dominum : qui ambulant in viis ejus .

Beati qui custodiunt iudicium, et faciunt justitiam in omni tempore.

Arcus fortium superatus est: et infirmi accincti sunt robore. Repleti prius pro panibus se locaverunt: et famelici saturati sunt.

Quanti Mercenarii in domo Patris mei abundant panibus: ego autem hic fame pereo.

Beati Viri tui, et beati servi tui, qui stant coram te semper, et audiunt sapientiam tuam.

### *Vindicta.*

**L**aqueum paraverunt pedibus meis, et incurvaverunt animam meam, sed ego persequar inimicos meos, et comprehendam illos: et non convertar donec deficiant. Tu Domine erue me in mirabilibus tuis, et da gloriam Nomini tuo.

Si dederò somnium oculis meis, et palpebris meis dormitationem, et requiem temporibus meis, donec inveniam locum Domino.

Creator omnium Deus terribilis,

et fortis, et justus, et misericors ;  
 Tu scis quae cogitant in nos ini-  
 mici nostri, et ignoramus quid age-  
 re debeamus. Domine, Domine ad te  
 sunt oculi nostri, ne pereamus.

*Petitio Veniae.*

**E**t nunc Domine Omnipotens,  
 Deus Israel, anima in angustiis, et  
 spiritus anxius clamat ad te. Audi  
 Domine, et miserere, quia Deus es  
 misericors: et miserere nostri, quia  
 peccavimus ante te. Vae nobis,  
 quia peccavimus. Propterea moe-  
 stum factum est cor nostrum: ideo  
 contenebrati sunt oculi nostri.

Quare in perpetuum oblivisceris  
 nostri, derelinquens nos in longitu-  
 dinem dierum?

Nisi quia Dominus adjuvit me,  
 paulo minus habitasset in Inferno a-  
 nima mea. Sed tu Deus in miseri-  
 cordiis tuis plurimis non fecisti nos  
 in consumptionem, nec dereliquisti  
 nos, quoniam Deus miserationum,  
 et clemens es tu, et ignoscens su-

per malitia. Parce igitur Domine,  
parce servo tuo; habenti fiduciam  
in sanguine Filii tui.

O Domine Jesu, Pastor bone, qui  
venisti in hunc Mundum peccatores  
salvos facere, quorum primus ego  
sum; miserere mei, quoniam in te  
confidit anima mea. Propter te ac-  
cedo cum fiducia ad thronum gratiae,  
ut misericordiam consequar, et gra-  
tiam inveniam. Tu misericors, et  
miserator Dominus. Tu patiens, et  
multum misericors. Tu suavis Domi-  
nus universis: et miserationes tuas  
super omnia opera tua.

Quomodo miseretur Pater filiorum,  
misereris Domine timentibus te: et  
ipse cognoscis figmentum nostrum,  
et recordaris quia caro sumus.

O longanimitas; et benignitas Dei  
adducens ad poenitentiam! Non aver-  
tis faciem tuam a nobis: et, si re-  
versi fuerimus ad te, avertetur a  
nobis ira furoris tui. Et si conver-  
sus fuerit, et ingemuerit peccator,  
peccatorum ejus non recordaberis am-  
plius.

Accipe igitur Domine cor plenum amaritudine, et pone lacrymas meas in conspectu tuo; cor enim contritum, et humiliatum Deus non despicies.

Ne simul trahas me cum peccatoribus, et cum operantibus iniquitatem ne perdas me. Sed miserere mei Deus secundum magnam misericordiam tuam: et cor mundum crea in me Deus, et spiritum rectum innova in visceribus meis.

A mandatis labiorum tuorum non recedam amplius: et in sinu meo abscondam verba oris tui; Juravi enim, et statui custodire iudicia justitiae tuae. Custodi Deus hanc voluntatem, et ad venerationem Nominis Sancti tui mens ista permaneat. Amen.

*In Tribulatione.*

**S**i erit malum in Civitate, quod Dominus non fecerit? Dominus mortificat et vivificat: deducit ad inferos, et reducit; bona enim et mala, vita et mors, paupertas et ho-

nestas a Deo sunt . Si ergo , sicut Domino placuit ita factum est , sit Nomen Domini benedictum .

Tu nescis modo , scies autem postea quam beati qui lugent ; quem enim diligit Dominus , corrigit et castigat ; quoniam arcta , et angusta est via , quae ducit ad vitam , et pauci inveniunt eam ; lata vero et spatiosa , quae ducit ad perditionem ; sed vae vobis , qui ridetis nunc , quia lugebitis , et flebitis .

Hoc autem pro certo habet omnis , qui te colit , quod vita ejus si in probatione fuerit , coronabitur ; si enim compatimur , et conregnabimus . Si fuerimus socii passionum , erimus et consolationum : Per multas enim tribulationes oportet nos intrare in Regnum tuum Domine , qui dicebas ad omnes : Qui vult venire post me , abneget semetipsum , et tollat Crucem suam quotidie , et sequatur me . Igitur haec mihi sit consolatio , ut affligens me dolore non parcas , nec contradicam sermonibus Sancti . Dominus es : quod rectum est in ocu-



illis tuis facias . Fiat Domine , fiat voluntas tua sicut in Coelo , et in Terra .

Respice in eum , qui talem sustinuit à peccatoribus adversus semetipsum contradictionem : qui peccatum non fecit , nec inventus est dolus in ore ejus ; nos autem peccavimus , inique egimus , recessimus à Testamento suo . Et nos quidem digna factis recipimus ; hic autem quid mali fecit ? sed et per proprium sanguinem introivit , Vir dolorum , et sciens infirmitatem . Qui vero dicit se in Christo manere , debet , sicut ille ambulavit , et ipse ambulare ; ille autem cum malediceretur non maledicebat , cum pateretur non comminabatur : tradebat autem judicanti se injuste : Qui peccata nostra ipse pertulit in corpore suo super lignum , et sicut onus grave gravata sunt super eum : Qui tanquam Agnus ad occisionem ductus , coram tonidente se obmutuit , et non aperuit os suum , pro nobis passus , et crucifixus . Inspiciam ergo , et faciam

secundum exemplar , quod mihi in Monte monstratum est . Levabo oculos meos in Montem , unde veniet auxilium mihi : et confitebor tibi Domine , quoniam iratus es mihi : et conversus consolaberis me . Conversus et ego sum ad te Domine in aerumna mea . dum configitur spina . Tu exurgens misereberis Sion , quia tempus miserendi ejus : quia venit tempus : quia venit nox tribulationis , quando nemo potest operari , incipiens pavere , taedere , et moestus esse . Ne itaque derelinquas me in tempore tribulationis : Spiritus quidem promptus est , caro autem infirma ; Nec sis tu mihi formidini , spes mea tu in die afflictionis ; sed facias cum tentatione proventum , et quamdiu fuero psallam Deo meo , cantabo Domino in vita mea : Ad Dominum cum tribularer clamavi , et exaudivit me : et eduxit me de lacu miseriae , et de luto foecis .

## VI.

## EXERCITATIO SEROTINA

*Ante Somnum.*

**D**omine Deus meus, et Creator Coeli, et Terrae, qui posuisti tenebras, et facta est nox: et in ipsa pertransibunt omnes bestiae sylvae; Qui das dilectis tuis somnum, sanctifica locum istum, ut in pace dormiam, et requiescam. Fiat Domine hac nocte cor meum, et corpus meum immaculatum; ut sit Templum Dei vivi, et Spiritus Sanctus tuus habitet in me. Scuto circumdet me veritas tua, ut non timeam a timore nocturno, a negotio perambulante in tenebris, et me non superet potestas tenebrarum. Custodiant me sancti Angeli tui, quibus mandasti de me, ut custodiant me in omnibus viis meis. Et tu Domine custodi me, ut pupillam oculi; et sub umbra alarum tuarum protege me.

In manus tuas commendo spiritum

d 6

meum ; ut , sive dormiam , sive vigilem , simul tecum vivam . Ne igitur dormites , neque dormias , qui custodis Israel . In lectulo meo quaeram per noctes quem diligit anima mea : tenebo te , nec dimittam Domine Jesu , qui , dum medium silentium contineret omnia ; et nox in suo cursu medium iter perageret , sponsus venisti , procedens de thalamo tuo : de utero Virginis Matris tuae , ut lux luceret in tenebris . Illustra igitur faciem tuam super servum tuum , et salvum fac filium Ancillae tuae , Matris tuae : ut cognoscam , et etiam in tenebris , mirabilia tua .

Visita servum tuum , sperantem in te qui penetrasti omnes inferiores partes : et inspexisti omnes dormientes ; et illuminasti omnes sperantes in Domino . Recordare etiam eorum , qui cum pietate dormitionem acceperunt : et post tenebras sperant lucem , de profundis clamantes ad te , Domine .

Non transgrediar in lecto meo ,

nec dicam : Quis me videt ? delictorum meorum non memorabitur Altissimus ; licet enim tenebrae circumdant me : et parietes cooperiant me : et nemo circumspiciat me ; cognovi tamen quia oculi tui multo plus lucidiores sunt super Solem , circumspicientes omnes vias hominum , et profundum abyssi , et hominum corda intuentes in absconditas partes . Sed anima mea desiderabit te in nocte : et spiritu meo in praecordiis meis : et erit nox illuminatio mea in deliciis meis . De mane vigilabo ad te : memor ero tui super stratum meum , ut in matutinis mediter in te , qui es adjutor meus . Dormiam Domine , sed cor meum vigilet ad te : ut , cum repente veneris , non invenias me dormientem cum fatuis , sed cum vigilantibus electis tuis festinem ingredi in illam requiem , ubi nox ultra non erit , et non egebunt lumine Solis , neque Lunae ; quoniam tu Domine Deus illuminabis eam : et lucerna ejus erit Agnus , filius tuus , cum quo regnabunt in saecula saeculorum . Amen . Amen .

## SANCTI EPHREM SYRI

PIA AD DEUM

## O R A T I O .

**P**eccavi in Coelum , et coram te Domine Deus omnipotens : nec jam sum dignus vocari filius tuus , aut oculos in Coelum attollere prae multitudine iniquitatum mearum , labiisque meis impuris gloriosum Nomen tuum invocare ; indignum enim me et Coelo , et terra reddidi , quia te , Dominum meum benignissimum , ad iracundiam provocavi . Quaeso , obtestorque Domine , ne projicias me à facie tua ; neque recedas à me , ne miser peream . Nisi enim gratia tua me praecessisset , jam ego periissem . et essem jam sicut pulvis ante faciam venti , et in nihilum in hac hora recidissem . Ex quo enim viam tuam dereliqui , nullus mihi laetus illuxit dies ; nam qui in peccatis jucundior dies visus est , acerbissimorum fuit acerbissimus . Caeterum

gratia tua fretus , atque confisus , spero te mihi robur , ac vires praebiturum , ut saluti meae consulere possim . Et nunc ad te supplex confugio , rogans ut me , a iustitiae semita devium , suscipias , et in rectam viam reducas . Effunde in me multitudinem miserationum tuarum , sicut olim in filium prodigum effudisti ; quia vitam dedecoravi meam , dissipatis divitiis gratiae tuae ; ipsaque mihi vita verecunda fuit . Miserere mei Deus ; et ne memineris vitae meae , quae est ad extremam reducta vilitatem . Miserere mei , sicut olim Peccatricis , et Latronis , et Publicani misertus es . Illi enim , cum in terra viverent , ab omnibus spernebantur ; at tu illos suscipiens , Paradisi deliciarum incolas fecisti . Suscipe igitur , et meam inutilis servitui poenitentiam ; nam et ego apud cunctos despicior , rejiciorque . Venisti enim Domine , non ut justos , sed peccatores ad poenitentiam vocares . Quia te decet gloria in saecula saeculorum . Amen .

F I N I S .

## PRECES QUOTIDIANAE

## AD IMPETRANDAM

*Bonam Mortem.*

**M**oriturum me certo scio . At quando ? Ubi ? Quomodo ? Prorsus ignoro .

Terra sum , et in pulverem , et terram convertetur caro mea .

Immortalis sum animo , et spiritu ; et ibo carne solutus in domum aeternitatis meae . O aeternitas interminabilis ! O mors ultimum punctum , à quo pendet aeterna aeternitas !

Tu solus vitae meae , Dominus , et Deus es . Vivere et hodie non recuso ; sed vitam nolo , si tibi , et tuis obsequiis vitam meam omnem non impendam . Si me mori vel hodie jubes , mortem non recuso ; moriar , ut te videam ; moriar tecum , ut in aeternum vivam . Ah fiat in me , de me , circa me , et circa mea omnia , sanctissima voluntas tua in tempore , et in aeternitate .



Paratum cor meum, Deus, paratum cor meum. Domine quid me vis facere? Domine quid me vis pati? Domine quid me vis fieri? Resignationibus nostris, quaesumus Domine, placare susceptis; et ad te nostras etiam rebelles compelle propitius voluntates.

Doleo, et toto corde doleo, quod te offenderim Deum meum, quia bonus es, sanctus es, amor meus es, Deus meus es.

Absorbeat, quaeso Domine, mentem meam ignita, ac melliflua vis amoris tui ab omnibus, ab omnibus, ab omnibus, quae sub Coelo sunt, ut amore amoris tui vivam, et amore amoris tui moriar, qui amore amoris mei dignatus es Deus factus homo vivere, et mori.

Domine Jesu Christe, propter illam amaritudinem mortis, quam pro me sustinuisti in Cruce, maxime in illa hora, quando nobilissima anima tua egressa est de benedicto corpore tuo, deprecor te, miserere ani-

mae meae in egressu suo , et perduc  
eam in vitam aeternam . Amen .

Libera nos , Domine , a subitanea ,  
et improvisa morte . Secundum ma-  
gnam misericordiam tuam .

Libera nos , Domine , morientes  
a mala morte . Secundum magnam mi-  
sericordiam tuam .

Libera nos Domine , morientes ab  
omni peccato . Secundum magnam mi-  
sericordiam tuam .

Libera nos Domine , morientes ab  
insidiis diaboli . Secundum magnam  
misericordiam tuam .

Libera nos , morientes ab omni ter-  
rore , et formidine . Secundum ma-  
gnam misericordiam tuam .

Libera nos , Domine , morientes a  
diffidentiae , et desperationis tenta-  
tione . Secundum .

Libera nos , Domine , morientes à  
spiritu praesumptionis . Secundum .

Libera nos , Domine , morientes a  
cordis duritie . Secundum .

Libera nos Domine , morientes ab  
ira tua . Secundum .

Libera nos , Domine , morientes a

potestate diaboli . Secundum .

— Libera nos , Domine , morientes a poenis Inferni . Secundum .

— Libera nos , Domine , morientes ab omni Mundi , Sanguinis , et carnis illecebra . Secundum .

†

— Concede nobis , Domine , morientibus susceptionem Sacramentorum .

Secundum .

— Concede nobis , Domine , morientibus abundantiam divinae gratiae tuae . Secundum .

— Concede nobis , Domine , morientibus perfectam contritionem .

Secundum .

— Concede nobis , Domine , morientibus firmam spem , et certissimam fidem . Secundum .

— Concede nobis , Domine , morientibus ardentem charitatem .

Secundum .

— Concede nobis , Domine , morientibus patientiam , et tolerantiam inter dolores . Secundum .

— Concede nobis , Domine , morientibus fortitudinem contra diabolicos

incursum. Secundum.

Concede nobis, Domine, morientibus perfectam cum tua voluntate conformitatem. Secundum.

Concede nobis, Domine, morientibus desiderium ardentissimum videndi Deum. Secundum.

Concede nobis, Domine, morientibus protectionem Beatae Mariae semper Virginis, Angelorum custodiam, et Sanctorum omnium intercessionem. Secundum.

Concede nobis, Domine, morientibus Sacerdotum orationes, et auxilium. Secundum.

†

Domine Jesu Christe Fili Dei vivi per sanctam Incarnationem tuam. Parce peccatis nostris, Domine, et salva nos.

Per sanctam Nativitatem tuam. Parce peccatis nostris Domine, et salva nos.

Per baptismum, et sanctum jejunium tuum. Parce.

Per sanctam, et laboriosam vitam tuam. Parce.

Per famem, sitim, et vigiliis

tuas .

Parce .

Per exclamaciones , et suspiria  
tua .

Parce .

Per amarissimas lachrymas tuas .

Parce .

Per maximos cordis tui pavores,  
et dolores .

Parce .

Per sanguineum sudorem tuum .

Parce .

Per manuum tuarum colligationes .

Parce .

Per opprobria , alaphas , et ludi-  
bria tua .

Parce .

Per acerbissimas flagellorum pla-  
gas .

Parce .

Per spineam coronam tuam .

Parce .

Per sacratissimas sanguinis effusio-  
nes .

Parce .

Per sanctam Crucem , et Passionem  
tuam .

Parce .

Per fel , et acetum a te gustatum .

Parce .

Per quinque vulnera tua .

Parce .

Per sanctam agoniam tuam .

Parce .

Per Animam tuam sanctissimam  
in manus Patris commendatam , et  
pro redemptione Mundi a corpo-

re separatam .

Parce .

Per mortem , et sepulturam tuam .

Parce .

†

Pater de Coelis Deus . Moriatur anima nostra morte iustorum .

Fili Redemptor Mundi Deus . Moriatur anima nostra morte iustorum .

Spiritus Sancte Deus . Moriatur .

Sancta Trinitas unus Deus .

Moriatur .

Per viscera misericordiae tuae .

Moriatur .

Per merita , et intercessionem Virginis , et Matris Mariae . Moriatur .

Per intercessionem Sanctorum Angelorum , et Archangelorum .

Moriatur .

Per merita , et intercessionem Sanctorum Apostolorum , et Evangelistarum . Moriatur .

Per merita , et intercessionem Sanctorum , et Sanctarum Martyrum .

Moriatur .

Per merita , et intercessionem Sanctorum Pontificum , et Confessorum .

Moriatur .

Per merita , et intercessionem San-  
ctorum Doctorum . Moriatur .

Per merita , et intercessionem San-  
ctorum Monachorum, et Eremitarum .  
Moriatur .

Per merita , et intercessionem San-  
ctorum Sacerdotum , et Levitarum .  
Moriatur .

Per merita , et intercessionem San-  
ctarum Virginum , et Viduarum .  
Moriatur .

Sancte Michael Archangele , Ange-  
li nostri Custodes , et omnes Sancti  
Beatorum Spirituum Ordines , et vos  
Beatissimi Patroni nostri N. N. N. N. N.  
defendite nos in praelio , ut non pe-  
reamus in tremendo Iudicio .

Tuque , o MARIA , Mater , et Vir-  
go , Mater admirabilis , Consolatrix  
afflictorum , et Regina Sanctorum o-  
mnium , intercede pro nobis , ut spi-  
ritus noster absque ulla peccati ma-  
cula , et poenae reatu , mereatur a  
Sanctis Angelis suscipi , et ad pa-  
triam Paradisi perduci .

Amen . Amen . Amen .

# INDEX

<i>In excitatione matutina</i>	Pag.	3
<i>Horae Canonicae</i>		21
<i>Ante Sacrum</i>		27
<i>In Adoratione SS<sup>mae</sup> Euchari-</i>		
<i>stiae, et visitatione B. Mariae</i>		
<i>Virginis</i>		50
<i>Examen conscientiae</i>		65
<i>Exercitatio serotina</i>		83
<i>Preces quotidianae ad impetran-</i>		
<i>dam bonam mortem</i>		88



## REIMPRIMATUR .

Si videbitur R<sup>mo</sup> P. Magist. Sac. Pal.  
Apostolici.

*Candidus Maria Frattini Arch.*  
*Philipp. Vicesg.*

## REIMPRIMATUR .

Dr. Philippus Anfossi Ord. Praed.  
Sac. Pal. Apost. Magister .



MAG 2005686